

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 19 DISEMBER 2012, PUKUL 10.00 PAGI

Bil. 28

PERTANYAAN-PERTANYAAN BAGI JAWAB LISAN

1. PN-1253-L16076
Tuan Mohd. Khalid bin Ahmad minta **MENTERI PENERANGAN, KOMUNIKASI DAN KEBUDAYAAN** menyatakan:-
 - (a) sejauh manakah arahan Menteri bagi kualiti perkhidmatan syarikat-syarikat telekomunikasi (*Ministerial Direction on Quality of Service, Direction No.1 of 2002*) di bawah Seksyen 55 dan 104(2), *Communications and Multimedia Act 1988* (Act 588) telah pun dipatuhi oleh syarikat-syarikat telekom dan adakah Kementerian telah menyediakan Petunjuk Prestasi Utama (KPI) daripada segi mutu perkhidmatan syarikat telekomunikasi; dan
 - (b) sejauh manakah Suruhanjaya Komunikasi dan Multimedia Malaysia telah bertindak terhadap syarikat telekom yang mendapat aduan mengenai panggilan yang tiba-tiba terputus (*dropped calls*) disebabkan masalah teknikal dan adakah Kementerian telah mengenakan denda terhadap syarikat-syarikat tersebut yang gagal memberi perkhidmatan yang memuaskan.
2. PN-1253-L15647
Tuan Khoo Soo Seang minta **MENTERI PELAJARAN** menyatakan bagaimana Kementerian boleh memastikan calon-calon latihan perguruan adalah mereka yang betul-betul berjiwa guru dan bukan mereka yang hanya berkelayakan tinggi tetapi *egocentric*.
3. PN-1253-L15892
Datuk Chiw Tiang Chai minta **PERDANA MENTERI** menyatakan adakah Kerajaan bercadang memperkenalkan Akta Patriotik dan Kesejahteraan Kaum dalam usaha membendung sebarang anasir negatif menyusup masuk ke negara ini dan meracuni pemikiran rakyat, termasuk cubaan menyalurkan dana daripada luar kepada golongan berkepentingan.

4. PN-1253-L15466
Tuan Haji Muhamad Yusof bin Husin minta **MENTERI SUMBER MANUSIA** menyatakan jumlah kes kemalangan jalan raya pergi dan balik ke tempat kerja yang menyebabkan kematian dan kecederaan kekal sepanjang tahun 2008, 2009, 2010, 2011 dan sehingga 31 Oktober 2012. Dan apakah langkah-langkah yang diambil untuk membasmi kemalangan ini.
5. PN-1253-L15690
Puan S. Bagiam a/p Ayem Perumal minta **MENTERI PELAJARAN** menyatakan apakah Kementerian bercadang untuk mewujudkan satu sistem untuk memberi latihan kepada guru-guru sekolah dalam menerapkan 'soft skills' kepada mereka di samping mengajar pelajaran-pelajaran seperti biasa.
6. PN-1253-L15706
Datuk Haji Yunus bin Haji Kurus minta **PERDANA MENTERI** menyatakan adakah projek PR1MA akan dibangunkan segera di Wilayah Persekutuan Labuan untuk keperluan golongan sederhana memandangkan penduduk Labuan semakin bertambah setiap tahun.
7. PN-1253-L15498
Dato' Nalla K. S. minta **MENTERI KEWANGAN** menyatakan apakah langkah-langkah Kerajaan di dalam memastikan kesemua rakyat termasuk kaum India diberi peluang dalam memiliki dan mengambil bahagian di dalam Skim Rumah Pertama Ku secara adil dan saksama.
8. PN-1253-L16054
Datuk Raja Ropiaah binti Raja Abdullah minta **MENTERI PELAJARAN** menyatakan apakah langkah-langkah yang diambil oleh Kementerian untuk membendung gejala *gangsterism* dan *bully* oleh pelajar-pelajar sama ada di dalam kawasan sekolah maupun di luar kawasan sekolah serta apakah langkah-langkah yang diambil untuk mengembalikan keyakinan dan kepercayaan rakyat bahawa kualiti pembelajaran yang diberikan di sekolah-sekolah kerajaan adalah yang terbaik dengan disiplin yang tinggi dan tenaga pengajar yang komited berbanding dengan sekolah-sekolah swasta.
9. PN-1253-L15421
To' Puan Hajah Zaitun binti Haji Mat Amin minta **MENTERI KEMAJUAN LUAR BANDAR DAN WILAYAH** menyatakan setakat manakah pencapaian Kementerian untuk membangunkan prasarana luar bandar melalui NKRA Infrastruktur Asas Luar Bandar bagi tempoh 2010 hingga 2012.
10. PN-1253-L15912
Datuk Chin Su Phin minta **MENTERI PENGANGKUTAN** menyatakan bilakah Kementerian akan menubuhkan sebuah syarikat penerbangan baru dalam usaha memperbaiki laluan masuk ke kedua-dua buah negeri ini melalui udara seterusnya memberi kebaikan kepada rakyat Sabah dan Sarawak.
11. PN-1253-L15485
Tuan Haji Ahamat @ Ahamad bin Yusop minta **PERDANA MENTERI** menyatakan adakah Kerajaan berpandangan supaya Institusi Parlimen perlu diberi kuasa 'eksklusif' bagi menghalang sebarang aktiviti menghina kepercayaan dan agama yang dianuti oleh penganut lain.

12. PN-1253-L15823
Dato' Mohammed Najeeb bin Abdullah minta **MENTERI PENGANGKUTAN** menyatakan kenapa operasi Lapangan Terbang Antarabangsa Kota Kinabalu tergendala selama 2 hari baru-baru ini. Berapakah jumlah kerugian yang dialami oleh semua sektor yang terlibat dan apakah langkah-langkah pencegahan yang akan dikuatkuasakan.
13. PN-1253-L15790
Puan Chew Lee Giok minta **MENTERI PELAJARAN** menyatakan apakah langkah-langkah yang akan diambil untuk membendung masalah kehamilan di kalangan gadis muda yang masih bersekolah.
14. PN-1253-L16141
Tuan Baharudin bin Abu Bakar minta **MENTERI KEWANGAN** menyatakan isu pelaksanaan Cukai Barang dan Perkhidmatan (GST) kerap dijadikan isu politik berbanding usaha untuk memberi penerangan kepada rakyat tentang kenapa ia perlu dilaksanakan serta kebaikan-kebaikannya. Apakah langkah-langkah yang akan dan telah diambil oleh Kementerian dalam menangani isu ini.
15. PN-1253-L15620
Tuan Syed Shahir bin Syed Mohamud minta **MENTERI SUMBER ASLI DAN ALAM SEKITAR** menyatakan apakah langkah-langkah yang diambil dalam menangani dampak akibat perubahan cuaca ke atas kualiti air.
16. PN-1253-L15872
Dato' Boon Som a/l Inong minta **MENTERI PELAJARAN** menyatakan sama ada Kementerian bercadang memperkenalkan subjek Bahasa Siam sebagai bahasa ibunda terutama di sekolah yang mempunyai ramai bilangan pelajar berketurunan Siam, serta sebagai bahasa tambahan untuk pelajar lain, sejajar dengan penggubalan Pelan Pembangunan Pendidikan Malaysia yang baru.
17. PN-1253-L16169
Dr. Ariffin bin S.M. Omar minta **MENTERI PENGAJIAN TINGGI** menyatakan memandangkan di saat ini beberapa pusat latihan pegawai angkatan tentera telah ditutup bagi memberi ruang dan peluang kepada Universiti Pertahanan Nasional Malaysia untuk meneruskan pembangunan sumber manusia ATM, bagaimanakah pihak Kementerian memenuhi ruang dan peluang yang diberi oleh ATM sehingga mereka sama-sama berpuas hati ke atas sukanan pelajaran, tenaga pengajar dan kemudahan bagi mencapai hasrat penubuhannya.
18. PN-1253-L16103
Dato' Syed Ibrahim bin Kader minta **MENTERI PELAJARAN** menyatakan pihak Kementerian telah membuat satu sistem bagi membantu meringankan beban buku teks di kalangan pelajar sekolah rendah dan menengah. Apakah langkah-langkah yang diambil untuk mengatasi masalah tersebut.

19. PN-1253-L15382

Tuan Haji Abdul Shukor bin Mohd Sultan minta **MENTERI KEWANGAN** menyatakan adakah Kementerian bercadang untuk mengkaji semula skim perlindungan insurans pemilik motosikal di luar bandar dan kawasan pedalaman yang jelas membebankan golongan ini yang rata-ratanya bekerja dalam industri kampung serta berpendapatan rendah.

20. PN-1253-L15535

Datuk Kadzim M. Yahya minta **PERDANA MENTERI** menyatakan pendedahan yang terkandung dalam Laporan Ketua Audit Negara 2011 bahawa Kerajaan Negeri Pulau Pinang telah membekukan tabung amanah perumahan Bumiputera bernilai RM33.36 juta dan apakah tindakan Kerajaan Persekutuan untuk menangani isu-isu yang mana seperti satu agenda tersirat Kerajaan Negeri itu mengeluarkan kaum Bumiputera daripada pusat aktiviti ekonomi utama di negeri itu.

21. PN-1253-L16063

Tuan Mohd. Khalid bin Ahmad minta **MENTERI SUMBER ASLI DAN ALAM SEKITAR** menyatakan :-

(a) sejak Malaysia menerima pakai *Basel Convention On The Control of Transboundary Movements of Hazardous Wastes and Their Disposal* pada 8 Oktober 1993, apakah tindakan-tindakan yang telah diambil untuk menangani masalah E-Waste di Malaysia dan adakah Kementerian bercadang untuk menggubal peraturan *take back policy* kepada pengeluar dan pengeksport barang elektrik dan elektronik mengambil balik barang yang telah luput untuk di kitar semula atau dilupuskan secara selamat; dan

(b) apakah hukuman yang akan dikenakan bagi pihak yang didapati bersalah melupuskan E-Waste secara haram di bawah Seksyen 34B, Akta Kualiti Alam Sekeliling 1974 dan sejak 30 Ogos 2007 berapa banyak kes '*illegal shipment E-Waste*' yang telah berjaya ditahan oleh Jabatan Alam Sekitar dan Jabatan Kastam dan Eksais Diraja Malaysia.

22. PN-1253-L15849

Tuan Saiful Izham bin Ramli minta **PERDANA MENTERI** menyatakan tentang penyenaraian FELDA Global Ventures Holdings Berhad (FGVH) di Bursa Malaysia yang pernah pada satu ketika telah menyebabkan paras semasa harga sahamnya jatuh di bawah paras harga ketika ia disenaraikan. Apakah sebab kejatuhan harga saham FGVH ini dan apakah Kementeriann akan masuk campur (*intervene*) untuk mempertahankan harga saham FGVH ini bagi melindungi kepentingan peneroka-peneroka kecil FELDA dan kakitangan FELDA yang merupakan pemegang saham minoriti di dalam FGVH.

23. PN-1253-L16073
Puan Roslin binti Haji Abdul Rahman minta **MENTERI PERTANIAN DAN INDUSTRI ASAS TANI** menyatakan jumlah pengeluaran sayuran dan ikan semasa negara dan nyatakan langkah-langkah Kementerian terhadap pengeluaran tempatan bagi memenuhi permintaan negara dan seterusnya mengurangkan import makanan bagi sayuran dan ikan.
24. PN-1253-L15627
Puan Hajah Khairiah binti Mohamed minta **MENTERI PEMBANGUNAN WANITA, KELUARGA DAN MASYARAKAT** menyatakan nisbah bilangan pusat asuhan kanak-kanak di pejabat-pejabat Kerajaan dan agensi Kerajaan berbanding bilangan pejabat-pejabat Kerajaan dan agensi Kerajaan di seluruh Malaysia dan adakah Kerajaan memberi insentif khas atau peruntukan khusus bagi penyediaan pusat-pusat tersebut.
25. PN-1253-L15422
To' Puan Hajah Zaitun binti Haji Mat Amin minta **MENTERI PENERANGAN, KOMUNIKASI DAN KEBUDAYAAN** menyatakan jumlah jualan hasil kraf tangan Terengganu seperti batik, songket, ukiran kayu, barang tembaga dan wau keluar negara serta nyatakan langkah-langkah Kementerian bagi meningkatkan jualan hasil kraf tangan berkenaan di pasaran antarabangsa.
26. PN-1253-L16041
Datuk Raja Ropiaah binti Raja Abdullah minta **MENTERI PEMBANGUNAN WANITA, KELUARGA DAN MASYARAKAT** menyatakan adakah langkah pencegahan dan pembendungan gejala jenayah pembuangan bayi yang dilaksanakan telah menunjukkan sebarang kesan dan adakah Kerajaan telah melaksanakan kajian menyeluruh (*secara holistic*) tentang punca permasalahan dan jalan keluar yang dikenal pasti untuk menghapuskan jenayah ini serta perlukah satu bentuk pendidikan formal di bawah satu mata pelajaran khusus diperkenalkan di peringkat sekolah menengah sebagai satu langkah pencegahan.
27. PN-1253-L15585
Datuk Pau Chiong Ung minta **MENTERI DALAM NEGERI** menyatakan:-
- (a) pendatang asing yang masuk ke negeri Sarawak secara haram melalui jalan tikus sering kedengaran, dalam tiga tahun terdekat ini berapakah jumlah warga negara jiran yang masuk secara haram ke Sarawak melalui jalan tikus telah berjaya dikesan dan ditangkap; dan
 - (b) apakah tindakan dan rancangan Kementerian bagi mencegah dan menyelesaikan masalah tersebut.
28. PN-1253-L15904
Datuk Chin Su Phin minta **MENTERI PEMBANGUNAN WANITA, KELUARGA DAN MASYARAKAT** menyatakan adakah terdapat kajian yang dijalankan oleh Kementerian bersama dengan pihak yang bertanggungjawab, mengenai peningkatan kes rogol di Malaysia, apakah hasil kajian tersebut dan adakah ianya membantu.

29. PN-1253-L15658
Tuan Khoo Soo Seang minta **MENTERI PENERANGAN, KOMUNIKASI DAN KEBUDAYAAN** menyatakan usaha-usaha Kementerian untuk memastikan pertunjukan-pertunjukan kebudayaan, khususnya di upacara-upacara rasmi luar negeri betul-betul menggambarkan kebudayaan atau kesenian yang tulen.
30. PN-1253-L15444
Dato' Dr. Johari bin Mat minta **MENTERI PEMBANGUNAN WANITA, KELUARGA DAN MASYARAKAT** menyatakan berapakah bilangan penduduk miskin tegar di negara ini dan apakah langkah-langkah yang telah diambil untuk mengatasi fenomena pengemis yang semakin ketara khasnya di bandar-bandar besar.
31. PN-1253-L15856
Tuan Saiful Izham bin Ramli minta **MENTERI KEWANGAN** menyatakan status penswastaan Syarikat Keretapi Tanah Melayu Berhad (KTMB), syarikat yang akan memperoleh penswastaan tersebut serta kesan penswastaan tersebut terhadap nasib ribuan pekerja-pekerja KTMB nanti dan apakah perancangan Kementerian bagi memastikan aset-aset strategik negara yang dipegang di bawah KTMB tidak akan tergadai begitu sahaja kesan daripada penswastaan ini.
32. PN-1253-L16090
Datuk Hj Saat bin Hj Abu minta **MENTERI DALAM NEGERI** menyatakan supaya memberi permit khas kepada pelayan-pelayan pusat hiburan, termasuk yang daripada negara asing yang bekerja di negara ini dan mereka semua ini menggunakan permit pelajar dan permit sebagai pelancong dikenakan caj yang sangat tinggi kepada pengusaha-pengusaha pusat hiburan. Dengan cara begini kita mungkin dapat membuat pengawalan pengawasan yang keterlaluan sekali gus mengelakkan berlakunya rasuah.
33. PN-1253-L15940
Dato' Dr. Firdaus bin Haji Abdullah minta **MENTERI WILAYAH PERSEKUTUAN DAN KESEJAHTERAAN BANDAR** menyatakan tindakan terkini yang dilaksanakan oleh Perbadanan Pembangunan Kampong Bharu semenjak ditubuhkan beberapa bulan yang lalu.
34. PN-1253-L15408
Puan Hajah Rohani binti Abdullah minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah Kerajaan bagi memupuk dan menyuburkan rasa tanggungjawab dan kasih sayang di kalangan generasi muda terhadap keluarga ke arah memantapkan institusi kekeluargaan.
35. PN-1253-L16118
Dato' Syed Ibrahim bin Kader minta **MENTERI DALAM NEGERI** menyatakan sejauh manakah keberkesanan polis komuniti yang diwujudkan oleh PDRM dalam konteks mendekatkan masyarakat dengan polis dan mengurangkan kadar jenayah.

36. PN-1253-L16149

Tuan Baharudin bin Abu Bakar minta **PERDANA MENTERI** menyatakan apakah Jabatan Perkhidmatan Awam (JPA) berhasrat untuk menentukan bidang-bidang pengajian pasca siswazah di bawah Hadiah Latihan Persekutuan dalam memastikan nilai modal insan penjawat awam dipertingkatkan selari dengan kemajuan pembangunan negara.

37. PN-1253-L15924

Puan Hajah Dayang Madinah binti Tun Abang Haji Openg minta **PERDANA MENTERI** menyatakan seramai 16 orang Ahli Parlimen dan bekas Ahli Parlimen kini menganggotai Agensi Kerajaan, GLC, Suruhanjaya, Perbadanan dan Lembaga di bawah Jabatan Perdana Menteri. Adakah mereka juga termasuk kalangan Senator dan bekas Senator.

38. PN-1253-L16070

Puan Roslin binti Haji Abdul Rahman minta **MENTERI PERDAGANGAN ANTARABANGSA DAN INDUSTRI** menyatakan bilangan mahasiswa yang menyertai Skim Usahawan Siswazah dan nyatakan bidang-bidang latihan keusahawanan yang diberikan serta bilangan siswazah yang mendapat pembiayaan dan jumlahnya.

39. PN-1253-L15613

Puan Hajah Khairiah binti Mohamed minta **PERDANA MENTERI** menyatakan adakah Kerajaan melalui JAKIM pernah membuat kajian tentang peratus bilangan orang Islam di Malaysia yang menunaikan sembahyang fardu lima waktu, jika ada, nyatakan peratusan tersebut.

40. PN-1253-L15661

Datuk Pau Chiong Ung minta **MENTERI PEMBANGUNAN WANITA, KELUARGA DAN MASYARAKAT** menyatakan:-

(a) adakah pihak Kementerian membuat kajian terhadap elaun tenaga pengasuh taska yang telah berdaftar dengan pihak Kementerian memandangkan elaun tersebut hanya dibayar atau diperuntukkan sebanyak RM500 sahaja; dan

(b) apakah langkah-langkah yang bakal diambil bagi mengatasi permasalahan ini memandangkan elaun pengasuh yang terlampaui rendah tidak bersesuaian dengan kekangan kerja yang semakin meningkat.

41. PN-1253-L15475

Tuan Haji Muhamad Yusof bin Husin minta **MENTERI KESIHATAN** menyatakan apakah langkah-langkah yang diambil oleh Kementerian terhadap penjualan 'ubat kuat' yang mengandungi *tadalafil* atau bahan-bahan terlarang yang begitu banyak di pasaran sekarang.

42. PN-1253-L15964

Puan Hajah Noriah binti Mahat minta **MENTERI PERTANIAN DAN INDUSTRI ASAS TANI** menyatakan apakah langkah-langkah yang diambil oleh Kementerian dalam memastikan industri agro makanan mampu berkembang dan pengeluarannya melebihi tahap sara diri.

43. PN-1253-L15880
Dato' Boon Som a/l Inong minta **PERDANA MENTERI** menyatakan persediaan yang dilakukan bagi menghadapi kemungkinan berlaku banjir di negeri-negeri di pantai timur dan pantai barat Semenanjung menjelang musim tengkujuh ini.
44. PN-1253-L15949
Dato' Dr. Firdaus bin Haji Abdullah minta **MENTERI PERTANIAN DAN INDUSTRI ASAS TANI** menyatakan apakah produk pertanian Malaysia yang paling banyak dieksport dan negara manakah yang menjadi pelanggan utamanya.
45. PN-1253-L16016
Tuan Subramaniam a/l Veruthasalam minta **PERDANA MENTERI** menyatakan sama ada wujud apa-apa cadangan untuk membentuk sebuah Lembaga Endowmen untuk mentadbir tiga kuil-kuil Hindu terpenting negara iaitu Kuil Sri Mariamman di Jalan Tun H.S. Lee, Kuil Ganesha Bukit Mahkamah dan Kuil Subramaniam Batu Caves yang kini ditadbir oleh sekumpulan persendirian berdasarkan perintah Peguam Negara.
46. PN-1253-L15755
Dato' Jaspal Singh minta **MENTERI DALAM NEGERI** menyatakan kadar jenayah di Malaysia mengikut negeri dan bangsa daripada tahun 2010 hingga kini, terutamanya jenayah yang melibatkan unsur keganasan seperti rompakan dan pembunuhan. Apakah langkah-langkah yang diambil bagi membendung kadar jenayah ini selain daripada menjatuhkan hukuman berat kepada pesalah.
47. PN-1253-L15776
Puan Hajah Mariany binti Mohammad Yit minta **MENTERI PERDAGANGAN ANTARABANGSA DAN INDUSTRI** menyatakan penerangan dan maklumat mengenai unjuran dan pencapaian sebenar eksport produk makanan halal ke luar negara dan mengapakah kedudukan daripada segi nilai eksport di belakang negara seperti Thailand dan Singapura. Bagaimanakah strategi yang lebih membina agar kita dapat menandingi negara-negara ASEAN yang lain dalam memonopoli pasaran makanan halal dunia.
48. PN-1253-L15756
Dato' Jaspal Singh minta **MENTERI DALAM NEGERI** menyatakan statistik warga asing yang tinggal lebih daripada jangka masa yang ditetapkan atau lepas tarikh luput pasport atau permit bagi tahun 2011-2012 mengikut negara. Apakah bilangan mereka yang tidak pulang ini terlibat dalam kes-kes jenayah.
49. PN-1253-L16006
Tuan Subramaniam a/l Veruthasalam minta **PERDANA MENTERI** menyatakan apakah langkah-langkah yang diambil untuk memilih, meneliti dan memasarkan hasil kajian dan inovasi dari universiti tempatan kepada pasaran tempatan dan antarabangsa.

ATURAN URUSAN MESYUARAT DAN USUL-USUL

- | | | | |
|----|----------------|--|-------------------------------|
| 1. | (D.R. 40/2012) | Rang Undang-undang Perkhidmatan Kewangan 2012 -
Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang.”
(18 Disember, 2012) | |
| | | [Menteri Kewangan] | |
| 2. | (D.R. 41/2012) | Rang Undang-undang Perkhidmatan Kewangan Islam 2012 | Bacaan Kali Yang Kedua |
| | | [Menteri Kewangan] | |
| 3. | (D.R. 39/2012) | Rang Undang-undang Bank Negara Malaysia (Pindaan) 2012 | “ |
| | | [Menteri Kewangan] | |
| 4. | (D.R. 32/2012) | Rang Undang-undang Pengurusan Strata 2012 | “ |
| | | [Menteri Perumahan dan Kerajaan Tempatan] | |
| 5. | (D.R. 38/2012) | Rang Undang-undang Reka Bentuk Perindustrian (Pindaan) 2012 | “ |
| | | [Menteri Perdagangan Dalam Negeri, Koperasi dan Kepenggunaan] | |
| 6. | (D.R. 43/2012) | Rang Undang-undang Perbadanan Kemajuan Filem Nasional Malaysia (Pindaan) 2012 | “ |
| | | [Menteri Penerangan, Komunikasi Dan Kebudayaan] | |
| 7. | (D.R. 42/2012) | Rang Undang-undang Binatang (Pindaan) 2012 | “ |
| | | [Menteri Pertanian dan Industri Asas Tani] | |

8. PN-1253-U15525

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan supaya disegerakan proses memansuhkan hukuman mati mandatori berdasarkan kepada maklumat berikut:- Menteri di Jabatan Perdana Menteri, Datuk Seri Mohamed Nazri Abdul Aziz berkata, beliau akan mengadakan perjumpaan dengan Perdana Menteri, Datuk Seri Najib Tun Razak dalam masa terdekat bagi membincangkan mengenai satu inisiatif akan dilakukan bagi mewujudkan moratorium (penangguhan) terhadap hukuman mati terhadap mereka yang didapati bersalah memiliki dadah. Mohamed Nazri menegaskan yang Kerajaan sedang menimbang cadangan menangguhkan pelaksanaan hukuman mati terhadap pesalah dadah di negara ini sementara menunggu hasil kajian semula yang dijalankan Pejabat Peguam Negara. Katanya hukuman ganti kes pemilikan dadah sedang dikaji Pejabat Peguam Negara. Sementara, Mohamed Nazri akan berbincang dengan Perdana Menteri supaya kes pemilikan dadah, mereka yang dijatuhi hukuman (mati), akan diminta moratorium, jangan digantung sebab Kerajaan kita sedang meneliti hukuman sedia ada. Mohamed Nazri juga berkata, permohonan moratorium itu wajar memandangkan sebahagian daripada 900 orang yang sedang menunggu hukuman mati ketika ini adalah pesalah dadah. Perlu disebut, kajian ini dilakukan bertujuan menyelamatkan nyawa rakyat Malaysia di luar negara seperti China, Columbia, Peru dan Venezuela yang berdepan hukuman mati akibat menjadi keldai dadah. Antara hukuman terbaik bagi menggantikan hukuman mati mandatori bagi pesalah dadah, Mohamed Nazri berkata, hukuman penjara 30 atau 35 tahun boleh dikenakan kerana kesalahan itu tidak lagi dianggap serius seperti jenayah pembunuhan. Jika hukuman mati mandatori bagi kesalahan dadah dimansuhkan, hakim akan menggunakan budi bicara dalam menentukan hukuman bagi pesalah dadah. Justeru, berdasarkan kepada senario berkaitan, saya mencadangkan agar Kerajaan mempercepatkan proses berkenaan. Jika perlu, satu jawatankuasa khas di peringkat Parlimen wajar diadakan. Ini penting demi untuk keharmonian dan kemakmuran sejagat dan kebajikan kepada keluarga para pesalah."

[Menteri di Jabatan Perdana Menteri]

9. PN-1253-U15526

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan dan mengesa agar kebebasan media berlaku secara sistematik, berhemah dan berintegriti. Tanggapan kebebasan media bagi pemimpin politik berdasarkan kebebasan untuk media yang hanya menyebelahi mereka dan yang seiring dengan mereka sahaja. Politik dan media sememangnya saling memerlukan. Orang politik memerlukan media untuk mempromosi diri dan wawasan mereka dan media pula memerlukan ahli politik sebagai bahan penulisan mereka. Lazimnya hubungan antara ahli politik dan media bagaimanapun tidak selalu kekal harmoni sepanjang masa. Lazimnya ahli politik akan menyanjung media apabila cerita-cerita positif tentang mereka dilaporkan. Namun begitu, apabila berita yang dilaporkan itu tidak positif, media akan dipersalahkan kononnya untuk menjatuhkan reputasi ahli politik terlibat. Kini telah menjadi satu trend apabila media dijadikan "punching bag" oleh ahli politik untuk menafikan berita yang tidak memihak kepada mereka. Ironinya, pihak yang menjadikan media sasaran saman yang rata-rata angkanya mencecah jutaan ringgit dan pihak sama juga yang melaung-laungkan tentang kebebasan bersuara dan menuntut kebebasan media di negara ini. Keadaan berkenaan bukan melibatkan ahli politik sahaja tetapi meliputi sebuah masyarakat dalam konteks kebebasan media.

Dan pengamal media yang berintegriti tidak takut untuk mempersembahkan berita berdasarkan fakta. Berani kerana benar. Mereka tidak takut dikritik mahupun menerima kutukan oleh pelbagai pihak. Justeru, bagi menentukan kebebasan media berlaku secara sistematik, berhemah dan berintegriti, apakah pihak Kementerian sedang merangka atau menggubal ke arah mana media negara ini sedang berada. Apakah kerajaan sedar bahawa satu majlis media kebangsaan perlu diwujudkan dan pertubuhan rasmi ini akan menjadi pemantau bagi kedua-dua pihak iaitu pengamal media dan masyarakat."

[Menteri Penerangan, Komunikasi dan Kebudayaan]

10. PN-1253-U15527

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan agar institusi kewangan mempertimbangkan untuk mempermudahkan pemberian pinjaman kepada pencipta produk inovasi termasuk membabitkan teknologi hijau dalam usaha melahirkan lebih ramai lagi generasi pencipta. Menteri Sains, Teknologi dan Inovasi, Datuk Seri Dr. Maximus Johnity Ongkili menegaskan bahawa sehingga kini banyak syarikat yang mahu membuat pinjaman untuk menjayakan penciptaan sesuatu produk, namun tidak dapat berbuat demikian ekoran syarat ketat institusi kewangan. Justeru, kerana mereka tidak mempunyai rujukan kejayaan lampau ciptaan berkenaan dan menganggap ia sukar dipasarkan. Untuk tujuan itu, pihak kementerian wajar membentuk satu jawatankuasa khas dengan Kementerian Tenaga, Teknologi Hijau dan Air serta Kementerian Kewangan untuk menyelaras kaedah bagi membantu pencipta terbabit. Kita juga berharap agar peserta atau pemohon dibantu dengan segera, sekali gus dapat menyelesaikan masalah pertimbangan insitusi kewangan yang memproses permohonan itu mengikut prinsip perbankan biasa. Saya juga mencadangkan agar insitusi kewangan mempertimbangkan untuk memberi nilai kepada hak intelek sesuatu produk inovasi yang dibentangkan pencipta bagi proses permohonan pinjaman. Jika ini dapat dilakukan, sudah pasti akan membantu dan menggalakkan para pencipta untuk menghasilkan produk yang bukan sahaja dapat memanfaatkan kepada masyarakat, bahkan dikomersialkan bagi menjana pendapatan yang tinggi."

[Menteri Sains, Teknologi dan Inovasi]

11. PN-1253-U15528

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan agar penglibatan sektor swasta juga diambil kira dalam memantapkan Pelan Pembangunan Pendidikan (PPP) yang dilancarkan oleh Perdana Menteri baru-baru ini yang menekankan kepada konsep ilmu yang mampu dimanfaatkan oleh generasi yang akan datang iaitu selari dengan tuntutan semasa dunia/global. Pelan berkenaan cukup rapi dan kemas di dalam mencipta hala tuju negara ke arah negara maju pada tahun 2020. Pelan yang mantap berkenaan semestinya memerlukan pemahaman dan pelaksanaan yang strategik di kalangan warga pendidik, ibu bapa dan para pelajar. Pelan yang mempunyai tiga gelombang iaitu pada 2013-2015; 2015-2020 dan 2020-2025 itu telah mengambil kira pelbagai harapan, rintangan, cabaran, situasi dunia dan perkembangan kemahiran di kalangan masyarakat.

Contohnya, apakah vokasional dan kemahiran (hand-on) telah dihidupkan dan diperkemaskan yang wajar diperkembangkan kepada para pelajar di peringkat sekolah menengah lagi. Ianya sebagai usaha untuk mengimbangi di antara ilmu bersifat akademik dan bersifat kemahiran. Kedua-duanya sudah pasti akan menjadikan negara kita lebih maju di dalam aspek pelajaran dan pembelajaran. Menyedari hakikat berkenaan, saya merasakan pelan berkenaan akan lebih mantap sekiranya peranan sektor swasta diambil kira. Pihak swasta akan menjadi pemangkin kepada konsep pembelajaran sepanjang hayat. Semua firma dan kilang-kilang bertaraf antarabangsa perlu melaksanakan CSR mereka dan memberi ruang/peruntukan kewangan kepada para pelajar yang ingin melanjutkan pelajaran ke peringkat yang lebih tinggi. Konsep ini telah dilaksanakan dengan jayanya di Australia dan Jerman. Sementara, para pelajar lepasan institusi kemahiran perlu difikirkan tentang ganjaran kepada mereka melebihi daripada yang berasaskan akademik semata-semata. Di masa sama, universiti awam/swasta hendaklah diperbanyakkan di negara ini sehingga peringkat PhD. Lebih penting supaya hasrat pelan ini menjadi kenyataan selari dengan Model Baru Ekonomi (MBE) ke arah menjadikan Malaysia sebuah negara maju berpendapatan tinggi."

[Menteri Pelajaran]

12. PN-1253-U15529
Dato' Haji Abdul Rahman bin Bakar akan mencadangkan:-

"Bahawa Dewan ini menyaran dan mencadangkan agar projek Perumahan Rakyat PR1MA di perbanyakkan lagi dan proses permohonannya dipermudahkan memandangkan rumah atau perlindungan merupakan salah satu keperluan manusia di dunia ini. Rumah juga merupakan suatu jaminan keselamatan dan kesihatan kepada penduduk dunia. Akibat kekurangan rumah atau tempat tinggal yang tidak terurus atau tidak menepati piawaian atau tidak lengkap atau tidak sesuai didiami, sudah tentu akan mewujudkan penyakit masyarakat yang lain termasuk penyalahgunaan najis dadah, kecurian, rogol, rompak, samun dan lain-lain. Atas sifat dan kesedaran akan kepentingan rumah kepada penduduk negara ini, pelbagai program telah dilaksanakan antaranya rumah mesra rakyat, rumah PPRT, rumah mampu milik dan rumah kos rendah/sederhana yang telah mendapat sambutan hangat di kalangan rakyat. Namun, melihat kepada penduduk negara kita yang berkembang pada kadar 3.5% setahun, saya rasa pertambahan berkenaan terus meningkat kepada keperluan rumah untuk berlindung. Justeru, pengekalan dan pelaksanaan rumah PRIMA adalah antara yang terbaik terutamanya di kalangan penduduk bandar. Bagaimanapun bilangan rumah berkenaan masih kecil dan perlu diperbanyakkan lagi. Saya suka mencadangkan agar pihak Kementerian Perumahan dan Kerajaan Tempatan (KPKT) terus memberi ruang kepada GLC atau anak syarikat Kerajaan negeri untuk membina rumah PRIMA di samping SPNB dan UDA. Sementara, KPKT juga diminta mempermudahkan proses permohonan secara online dan memberikan jawapan segera terhadap permohonan berkenaan. Ini penting sebagai slogan "Rumahku Syurgaku" yang memberi kesan psikologi kepada pemohon (rakyat) kerana dirasakan mereka dihargai. Kalau sesuai, rumah kedua/ketiga juga boleh ditimbangkan kepada pemohon sekiranya berlaku lambakan kepada rumah-rumah PRIMA."

[Menteri di Jabatan Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN NEGARA)**

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.41	Laporan Tahunan dan Penyata Kewangan Lembaga Pemantauan Audit Bagi Tahun 2011	19 Disember 2012
ST.56	Akta Mahkamah Kehakiman 1964 Akta Kaedah-kaedah Mahkamah Rendah 1955 Kaedah-kaedah Mahkamah 2012	19 Disember 2012
ST.57	Akta Mahkamah Kehakiman 1964 Akta Kaedah-kaedah Mahkamah Rendah 1955 Kaedah-kaedah Mahkamah (Pindaan) (No.1) 2012	19 Disember 2012
ST.58	Akta Mahkamah Kehakiman 1964 Akta Kaedah-kaedah Mahkamah Rendah 1955 Kaedah-kaedah Mahkamah (Pindaan) (No.2) 2012	19 Disember 2012
ST.59	Akta Kastam 1967 Perintah Duti Kastam 2012 P.U(A) 275 bertarikh 28 Ogos 2012	19 Disember 2012
ST.60	Akta Kastam 1967 Perintah Duti Kastam (Barang-barang Berasal dari Negeri-negeri ASEAN) (Tatanama Tarif Berharmonis ASEAN dan Perjanjian Perdagangan Barang ASEAN) 2012 P.U(A) 277 bertarikh 28 Ogos 2012	19 Disember 2012
ST.69	Akta Mahkamah Kehakiman 1964 Kaedah-kaedah Mahkamah Persekutuan (Pindaan) 2012	19 Disember 2012
ST.70	Akta Mahkamah Kehakiman 1964 Kaedah-kaedah Mahkamah Rayuan (Pindaan) 2012	19 Disember 2012